

DEO OPTIMO MAX.

UNI ET TRINO,

VIRGINI DEI-PARÆ, ET S. LUCEÆ,

Orthodoxorum Medicorum Patrono.

BIU Santé
Médecine
Paris

QUÆSTIO MEDICA

QUOD LIBETARIIS DISPUTATIONIBUS

manè discutienda in Scholis Medicorum, die Jovis undecimâ mensis

Januarii, anno Domini M. DCC. LXXXVII.

M. FRANCISCO-HENRICO-THEODORO COZETTE, Doctore
Medico, Præside.

*An pleræque glandulæ, actione corpori viventi propriâ sanguinem mutando,
suos generent humores.*

I.

PASSIM in corpore humano diversæ naturæ reperiuntur humores, quos
ibi varios ad fines sapiens natura dispensavit.

Serum tenue, pellucidum, globum oculi in sphæram distendit, luminique facile permeabilem reddit. Lacrymalis latex, falsus, aquosus, corneæ faciem anteriorem continuo flumine alluens, irritantia corpuscula averrit obœcantemque desiccationem prævertit. Mucus lentus, insipidus, ad naturam gummeam proximus, vias aereas, cibarias, urinarias &c, molli linimento obducens, exquisitam earum sensibilitatem & fovet & tuetur. Salivalis & pancreaticus succus, aquosus, subsaponaceus, alimenta diluit, eorumque incohat solutionem, quæ bili, liquore subviridi, pungentem ingratum odorem spirante, amaro, alkalino, saponaceo resinoso, absolvitur. Sperma, quod sub inertis muci specie primum vitæ excitamentum recondit, in vesiculis suis moratur, donec tempestivâ emissionem, destinata in loca vibretur. Foetui è matris sinu recenter expulso, ubera ejus dulcis offerunt liquoris copiam, saccharo, oleo, lymphâ referti, ad vegetabilem naturam vergentis concoctricibusque illius accomodati viribus. Cerumen aurium, flavum, intensè amarum, resinosum, ex interiori ductûs auditorii facie exsudat. Sebo quodam olido, tenera balani nympharumque integumenta lubricantur. Passim cutis humorem ejusdem naturæ inolentem verò, in cryptis suis reclusum, eundem habet ad usum. Liquor articularis, mucosus, unguinosus, lentus, extremis appositus ossibus, eorum mollit affrictus omnigenisque moribus faver. Adeps, quæ oleum est ferè concretum, in telæ cellulosæ loculis ubique diffusa, solidis flexilitatem, cuti albedinem, formis rotunditatem & elegan-

riam conciliat. Lympha tenuior sanguinis, calore viribusque circulationis adacta, in corporis caveas undique depluens, organorum contentorum superficiem irrorat ne conserveant. Serum crudum saliaque hæterogenea quibus inficitur sanguis, ab ipso continuo segregantur, & sub citrei liquoris specie in vesicam manant. Pars tandem quædam humorum actionibus vitæ attrita, in halitum tenuem resolvitur qui per cutis spiracula indefinenter exhalatur.

Humores illi diversi communem à sanguine originem ducunt. Quidam organum nullum habent generationi suæ specialiter à naturâ destinatum; adeps nempe, perspirationis materies, aquosus oculi latex, lympha cavitatum. Cæteri, propriis canalibus venarum modo cocunibus, ex interioribus quibusdam vehuntur organis quæ glandulæ dicuntur; partes scilicet corporis molles, colore, formâ, mole, consistentiâ, texturâ admodum diversæ, omnigenis vasibus nervisque instructæ, quæ in infinitos numero furculos in earum substantiâ extenuantur donec oculi fugiant aciem. Particularum fabrica quæ carnem glandulæ propriam constituunt, quæ ultimos arteriarum & nervorum accipiunt fines, quæ nascentium canalium excretoriorum mittunt capillamenta, quæ tandem certe in causâ sunt cur ex mero cruore quem ministrabant arteriæ, novus nunc & longè diversus fluat liquor, fabrica uno verbo glandulæ propria nos laetemperque fortassè latebit.

I I.

NATURÆ scrutatores, in recessus obtusis sensibus invios, imaginationis acie penetrare tentaverunt.

Plerique, sanguineum omnibus dictis humoribus instructum in vasibus suis moveri supponentes, ipsorum tantummodò fieri secretionem statuerunt, illamque diversimodè finxerunt.

Multi rudibus analogiis decepti, huic operationi corporum non viventium mechanismum adaptaverunt. Hic organa secretoria cribra sunt quorum pori figuræ determinatæ sibi accomodata corpuscula admittunt, cætera excludunt. Ibi, cola sunt humore secernendo à formatione embrionis impregnata, ejusdem naturæ liquorem attrahentia, aliis impervia. Modò homogeneæ particulæ mutuâ attractione in discedentem liquorem coeunt. Modò pars glandulæ solida moleculas attrahit quibusculum densitate quodam modo convenit. Alibi, vasorum dispositione, primò supponitur sanguis organo secretorio ministrari majori refertus proportionem fluidi separandi; tunc operosâ combinatione omnium quæ excogitari potuerunt mechanicarum conditionum, tum in potentiis moventibus, tum in particulis motis, sic illæ diriguntur moleculæ, ut solæ excretorios subeant canales.

Alia tandem hypothesi ingeniosior, & ad naturam, ut nobis videtur, propius accedens, totam rem à legibus sensibilitatis & irritabilitatis deducit; propriam nempe secernentibus cuiusque glandulæ vasibus tribuit appetentiam, quâ duce determinati saporis particulas imbibunt, cæteras recusant.

In argumentis immorari, quibus debellari possunt singulæ illæ opiniones, tædiosum esset & inutile; unâ nimirum observatione, communi earum everso fundamento, totum ex se corrui edificium. Quid etenim de illis fiet omnibus, si sanguis humores omnes secernendos non contineat? Jam verò, in illo sanè repariantur, lympha cavitatum, aquosus humor oculi, principia urinæ proxima, perspirationisque fortasse materies; quos quidem humores à sanguine solummodo secerni lubenter annuimus; nullum verò aliud, neque saccharum aut butyrum lactis, neque resnam bilis, neque mucum, neque semen, &c. sensibus offert.

2^o. Tam abundans sæpè sit quorundam eorum, bilis, verbi gratiâ, lactis, muci evacuatio, ut impossibile sit tantam copiam in sanguine latuisse inconspicuum 3^o. Denique nullâ observatione satis certâ constat quòd omninò abolitâ actione glandularum humores de quibus agitur fundentium, major in sanguine eorum reperta fuerit proportio, quod fieri debuisset, quin contra castrati mares semen non spirant. Ergo humores illi in sanguine non præexistunt; ergo in organis suis non feceruntur, ergo in eis generantur, sanguine ibidem proprietates quibus insigniuntur acquirente.

III.

HANC veritatem perspectam habebant fermentorum hypotheseos auctores; ast in modo quo rem peragi declaraverunt illos errasse demonstrant sibi dissimiles humores in variis ætatibus, temperiebus, subjectique dispositionibus; eorum aliena à liquoribus fermentatione generatis natura; deficientes tandem fermentationi requisitæ conditiones.

Nihil in absconditam metamorphoseos illius causam anatomica inspectio, nihil chemica, nihil physica corporum vitæ orbatorum phænomena lucis refundunt; de hac itaque naturæ viventis operatione, (ut de multis aliis) proprias ejus leges observatione interrogemus, cum ipsâ sedulò incedamus, cum ipsâ sistamus; pauca scire satius ducentes, quam speciosis erroribus allucinari.

Corpus mucosum, commune vegetabilium & animalium alimentum, paucas, extrâ eorum corpora, in qualitibus suis sensibilibus patitur mutationes, sive motibus intestinis qui spontè in ipso excitantur, sive corporum externorum actionibus. Quam multiplices contrâ organicâ eorum actione induit formas!

Substantiarum animalium spontè putrescentium effluvia ferè semper eadem reperiuntur; perspirata autem materia peculiarem in singulis hominibus sortitur alterationis modum, quem delicatus canis odoratus discernere novit.

Medicamenta pleraque quæ directè in humores agere non possunt, sive in ipsis non recipiantur, sive exiguâ nimis quantitate illis misceantur; quorum sola evidens operatio in motibus quibusdam excitandis aut sopiendis consistit, notabiles tamen liquoribus animalibus alterationes inferunt.

Eodem modo exigua admodum venenorum quorundam portiuncula, in corpus humanum intromissa, subitam & universalem parit dissolutionem.

Immanis iræ convulsionibus, in subtile mutatur venenum blanda ex se & innocua quorundam animalium saliva.

Idem animi pathema sæpè bilis alterata vomitum excitavit.

Vehementi denique animi commotione sæpius fit, ut lac modò molle & resiciens infanti præbens alimentum, totum illius corpus perturbet.

IV.

HIS omnibus abundè professò demonstratur, corporis viventis liquorum mixtionem virium ejus motricium imperio subjici; illud scilicet tales in eos exercere posse actiones, ut novæ in eis oriantur qualitates.

Nil igitur mirum, quin imò observatis œconomix animalis legibus consentaneum est, glandulis vim inesse sanguinis dotes mutandi, sicque alienæ ab ipso indolis humoribus ortum præbendi.

Nullum cerè de hac re supererit dubium, si attenderis quòd glandularum actione vigente, benè constituti & ad fines suos apprimè respondentes, labefactâ, inertes, depravatâ, depravati, auctâ, copiosi, abolitâ, nulli gignantur humores.

4
Constat insuper magnam in illis actionibus, quemadmodum & in mutationibus quæ inde in humoribus oriuntur esse posse diversitatem; cuique porro glandulæ suus est sensus, sua elementorum propriorum fabrica, cur suus ipsi non esset & agendi modus, quo peculiarem fluido arterioso inferret alterationem?

Nullæ dantur potentiæ five chymicæ, five mechanicæ, quibus tales tribuamus effectus, propriæ sunt itaque corpori viventi. Quales sint earum physica conditiones, parvi refert; proposito nostro satisfacimus si earum existentiam & ultimos effectus in aperto posuerimus. V.

U T quæstionem nostram iustis circumscribamus limitibus, hîc annotare debemus quod adipis quamvis in sanguine non præexistentis idem non nobis videatur generationis modus. 1°. Etenim, nullum organum peculiare habet suæ formationi à naturâ destinatum. 2°. Lenta illius accumulatio, circumstantiæ huic faventes aut obstantes, succus gelatinosus ejus loca in immaturo foetu, extremo senio & cachexiâ occupans, grumi adiposi in medio illo succo maturescendo hunc munculo nascentes, analogia tandem seminum emulsivorum quæ tota primò mucilaginea, ad oleosam sensim naturam transeunt, satis demonstrant illum succo nutritio redundantem natales suos debere, qui in loca compagis animalis inania propulsus, morâ, calore moderato, aquæ dissipatione mutuâque fortasse principiorum reactione, hanc spontè patitur transformationem.

Fusus itaque jam exposita colligendo; si plerarumque glandularum humores sanguis non continet; si corpori viventi in genere, specialiterque humano, potentiæ insunt nulli chemico aut mechanico agenti affines, quæ sic liquores ejus mutare valent, ut novæ & diversæ in ipsis oriantur qualitates; si aliunde mutationes in glandulosi liquidi indole, mutationi quæ glandulæ actioni contingit respondent, cur non concludamus:

Ergo pleræque glandulæ, actione corpori viventi propriâ sanguinem mutando, suos generant humores.

DOMINI DOCTORES DISPUTATURI.

M. Philippus-Alex. BACHER. M. Benjaminus-Mich. SOLIER M. Guido DANIEL DESPATU-
DE LA ROMILLAIS, utrius-
que Pharmacia Professor. REAUX.

M. Antonius-Laurentius DE M. Claudius LAFISSE. M. Clericus VACHIER.
JUSSIEU, Eques, Regi à
Consiliis & Secretis, Regiæ
Scientiarum Academia So-
cietatis, in Horto Regio Bota-
nicæ Professor & Demonstrator.

M. Joannes-Jacobus NOLLAN. M. Jos. Ignatius GUILLOTIN. M. Petrus Josephus MORISOT
DESLANDES.

Proponebat Parisiis, MARIA-ANTONIUS PETIT, Sueffionæus, Saluberrimæ
Facultatis Medicinæ Parisiensis Baccalaureus, Theses Autor.

A. R. S. H. 1787 AB OCTAVA AD MERIDIEM.

Typis QUILLAU, Saluberrimæ Facultatis Medicinæ Parisiensis Typographi.

